

LEHIAKETA ARAUDIA



GIPUZKOAKO BATEL LIGA

1. ARTIKULUA.- ALDERDI OROKORRAK

1. Gipuzkoako Batel Liga Gipuzkoako Arraunketa Federazioak antolatzen duen lehiaketa ofiziala da, eta batelen liga erregular baten formatua izango du.
2. Gipuzkoako Batel Liga antolatzea Gipuzkoako Arraunketa Federazioari bakarrik dagokio.
3. Gipuzkoako Batel Liga arautzeko araudi honetan jasotakoa erabiliko da, alde batetik, eta, bestetik, gertaera horrekin eta haren estropadekin zerikusia duten organo eskudunek onartzen dituzten akordio eta ebazpenak.
4. Gipuzkoako Arraunketa Federazioak —antolatzaila den aldetik eta Zuzendaritza Batzordeak hala erabakita— ahalmena du lehiaketa hau babesten duen entitatearen "Sari Nagusia" deitzeko.
5. Era berean, Gipuzkoako Arraunketa Federazioari dagokio Gipuzkoako Batel Liga osatzen duten estropada guztiak antolatzea. Estropada horiek antolatzeko nahiz gauzatzeko edozein pertsona eta entitateren laguntza izan dezake Gipuzkoako Arraunketa Federazioak.

2. ARTIKULUA.- ESTROPADEN EGUTEGIA

1. Gipuzkoako Arraunketa Federazioaren ohiko Batzar Nagusiak erabakiko du Gipuzkoako Batel Liga osatzen duten estropadak zenbat izango diren, eta noiz eta non jokatuko diren.
2. Behin Gipuzkoako Batel Ligako egutegia onartu ondoren, jardunaldiren bat edo estropadaren bat bertan behera gera daiteke justifikaturiko arrazoiengatik. Gipuzkoako Batel Ligako estropadak bertan behera uzteko ahalmena ondoko organoek dute:
 - a) Estropada egunean bertan —hasi aurretik edo estropada jokatu bitartean— gertatu diren zirkunstantziengatik baldin bada, GAFeko Zuzendaritza Batzordeko kideek edo haiek hautatutako pertsonak erabakiko du, Estropadako Epaimahaiak edo presidenteak txostena aurkeztu ondoren eta proban parte hartzen duten delegatuak entzun ostean.
 - b) Aurreko atalean aurreikusitakoez bestelako zirkunstantziengatik baldin bada, Gipuzkoako Arraunketa Federazioaren Lehiaketako Epaille bakarrik erabakiko du.

3. ARTIKULUA.- PARTAIDEAK

1. Gipuzkoako Batel Ligan parte hartu ahal izango dute Gipuzkoako Arraunketa Federazioko kide diren taldeek, baina betiere federazio-betebeharrak egunean izan beharko dituzte.
2. Parte hartzen duten taldeetako arraunlari, teknikari eta ordezkariak indarrean eduki beharko dute Gipuzkoako Arraunketa Federazioak tramitaturiko eta Euskadiko Arraunketa Federazioak emandako lizentzia, euren kluba ordezkatzeko dutela frogatzen duena.
3. Klub berak, kategoria batean, ontzi bat baino gehiagoren izena eman dezake Gipuzkoako Batel Ligan eta talde batek baino gehiagok osatzen duten estropada bakoitzean. Kasu horretan, ordezkatzeko duten klubaren izenaz gain, honako letra hauetako bat izango dute, hurrenez hurren: A, B, C, eta abar.

Aldiz, senior kategorian klub bakoitzeko gehienez hiru (3) taldek eman ahalko dute izena Gipuzkoako Batel Ligan.
4. Nolanahi ere, Gipuzkoako Batel Ligan eta hura osatzen duten estropadetan parte hartu ahal izango dute Gipuzkoako Arraunketa Federazioaren kide ez diren klubek, baldin eta mugaz gaindiko hitzarmenen bat izenpetzen bada horretarako.

4. ARTIKULUA.- KATEGORIAK

1. Gipuzkoako Batel Liga eta bere estropadak honako kategoria hauetan jokatuko dira:

<ul style="list-style-type: none"> • Infantil emakumezkoak • Promesa emakumezkoak (Infantil-Kadete) • Infantil gizonezkoak • Kadete gizonezkoak 	<ul style="list-style-type: none"> • Jubenil emakumezkoak • Jubenil emakumezkoak • Emakumezkoak absolutua (Jubenil eta/edo Senior) • Senior gizonezkoak
---	---

“Infantil emakumezkoak” kategorian gutxienez lau (4) ontzik eman behar dute izena Gipuzkoako Batel Ligan. Lau ontzi baino gutxiago egonez gero, kategoria bakarra ezarriko da: “Infantil-Kadete emakumezkoak”.
2. Gipuzkoako Batel Ligako estropadekin batera eskolarteko estropadak jokatu ahal izango dira; horiek arautzeko, aplikagarriak diren araudiak eta Gipuzkoako Arraunketa Federazioaren eta Gipuzkoako Foru Aldundiaren arteko hitzarmenak erabiliko dira. Estropada horietan zerbitzu teknikoa Gipuzkoako Arraunketa Federazioak eman badezake ere, ez dira lehiaketa federatuak izango.
3. Gipuzkoako Batel Ligan eta bere estropada bakoitzean, kategoria bakoitzean parte hartzen duten taldeak kategoria horretako arraunlariz osatuta egongo dira. Dena dela, kategoria bereko arraunlariek eta beheragoko kategorietako patroik batek osatu ahal izango dute talde bat, betiere pisuari dagozkion arauak betetzen badira.
4. Kirolari batek ezingo du estropada bereko bi txandatan parte hartu, kategoria berekoa izan zein ez. Izena emateko orrian ordezeko bezala agertze hutsak ez du esan nahi kirolari batek estropada edo jardunaldi batean parte hartu duenik. Patroiek ez dute izango halako mugarik.

5. ARTIKULUA - TALDE (BATEL) MISTOAK

1. Talde mistoek parte hartu ahal izango dute Gipuzkoako Batel Ligan. Talde mistotzat hartuko dira klub bereko eta/edo kategoria desberdineko kirolariz osaturiko taldeak, kirolarien generoa (sexua) edozein delarik ere.
2. Estropadako sailkapenean agertu arren, talde mistoek ez dute puntuaziorik izango Gipuzkoako Batel Ligako sailkapenean.
Gipuzkoako Batel Ligako estropadetako sailkapen-orrietan, talde mistoak sailkapenaren azken postuetan ageriko dira, Ligan puntuatzen duten ontziek baino denbora hobea lortu arren.
1. Kategoria batean parte har dezakete kategoria bat goragoko kirolariz osatutako talde mistoek.
Adibidez, kadete kategorian parte hartzen duen talde misto batean kadete edo kategoria bat goragoko (jubenil) kirolariak soilik egon daitezke; aldiz, jubenil kategorian parte hartzen duen talde batean ezingo da kategoria bat beheragoko (kadete) kirolaririk egon.
3. Talde misto batek kategoria batean parte hartzen badu, kategoria horretako gutxienez bi (2) arraunlari eduki beharko ditu.

6. ARTIKULUA.- BATELEN PISUA

AEFren Estropadetarako Arautegiko 68. artikulua ontzien pisuaren inguruan ezarritako baldintzei dagokionez, bateletan ez da lastarik erabili behar; hots, ontzi batek gutxienerako pisua izateko behar duen osagarria batelean finko egongo da, zuntzez eta erretxinaz estalia.

7. ARTIKULUA.- GIPUZKOAKO BATEL LIGAN IZENA EMATEA

1. Gipuzkoako Batel Ligan parte hartu nahi izanez gero, izena eman beharra dago.
2. Izena ligako 1. jardunaldia baino lehen eman behar da.
3. Gutxienez Gipuzkoako Batel Ligako estropada batean parte hartu duten taldeen klub guztiak sailkapenean agertuko dira.

8. ARTIKULUA.- GIPUZKOAKO BATEL LIGAKO ESTROPADETAN IZENA EMATEA

1. Gipuzkoako Batel Ligako estropadetan parte hartzeko izena antolakuntzak hartarako prestatutako eredu ofizialean emango da.
2. Jardunaldi batean parte hartu nahi duten taldeen izenak Gipuzkoako Arraunketa Federazioan egon beharko dira jardunaldiaren aurreko asteazkeneko 21:00ak baino lehen, eta, asteazkena jaieguna bada, astearteko 21:00ak baino lehen.

3. Estropada edo jardunaldi bakoitzean izena emateko orria aurkeztu ahal izango da antolakuntzak garaiz eta behar bezala jasoko duen edozein bitarteko erabiliz. Estropada edo jardunaldi bakoitzerako izena emateko bitarteko ofizialtzat hartuko dira faxa eta antolakuntzaren egoitzan bertan entregatzea. Beste bitarteko batzuk ere erabil daitezke (posta elektronikoa, ohiko posta, mezularitza eta abar), baina ez da antolakuntzaren ardura izango orria bidean galtzen bada edo garaiz iristen ez bada. Ez da onartuko kasu bakar batean ere telefono bidez izena ematea.
4. Klub batek estropada batean batel bat baino gehiago apuntatu eta denak agertzen ez badira irteerara, Gipuzkoako Batel Ligako hurrengo estropadan, kategoria horretan, aurreko estropada horretan parte hartu duen talde-kopurua soilik apuntatu ahal izango du. Ezinbesteko edo ezusteko baten ondorio izan bada ez agertzea, eta behar bezala egiaztatzen bada, hurrengo estropadetan berdin-berdin parte hartu ahal izango dute. Ez dira ezinbesteko edo ezusteko arrazoitzat hartuko tripulazioa osatzeko kirolari bat edo batzuk falta izana, agertzea eragotzi dien arrazoia edozein dela ere.
5. Kirolari batek ezingo du bi klubetako ontzietan parte hartu Gipuzkoako Batel Ligako estropadetan. Hau da, behin kirolari batek Gipuzkoako Batel Ligako estropada batean parte hartzen duenean (izena eman eta parte hartu), gero ezingo da liga bereko estropadetan beste klub batekin aritu. Artikulu honetan jasotakoa betetzen ez bada, kirolari-zerrenda bidegabetzat joko da.

9. ARTIKULUA.- TXANDAK, IRTEERA-HURRENKERA ETA KALEEN ZOZKETA

1. Estropada bakoitzeko txanden banaketa eta irteera-hurrenkera antolakuntzak egingo du izena emateko epea amaitzen denean, eta parte hartuko duten taldeei (batelei) jakinaraziko die.
2. Txandak banatzeko edo irteera-hurrenkera zehazteko kontuan hartuko da une horretan nola dagoen Gipuzkoako Batel Ligako sailkapena, eta honela jokatu da:
 - a) Erlojuaren kontra, banaka edo binaka jokatu diren probetan, atzekoz aurrera irtengo dira taldeak, Gipuzkoako Batel Ligako sailkapena aintzat harturik. Gipuzkoako Batel Ligako lehen jardunaldian edo estropadan irteera-hurrenkera zozketaz erabakiko da; zozketa hori izena eman duten taldeei jakinaraziko zaien lekuan eta egunean gauzatuko da.
 - b) Lineako estropadetan, eta estropada eremuak duen kale-kopuruaren arabera, azken txandan irtengo dira Gipuzkoako Batel Ligako sailkapenean lehen postuetan sailkaturik dauden taldeak, eta horrela hurrenez hurren. Gipuzkoako Batel Ligako lehen jardunaldian edo estropadan irteera-hurrenkera zozketaz erabakiko da; zozketa hori izena eman duten taldeei jakinaraziko zaien lekuan eta egunean gauzatuko da.
3. Talde mistoak edo estropada jokatzeko unean Gipuzkoako Batel Ligan izena emanda ez duten taldeak kategoria bakoitzeko lehen txandetan irtengo dira; aldiz, erloju-contrako estropadetan lehenak irtengo dira.
4. Kaleen banaketa jardunaldiaren aurreko bileran egingo da, binakako lineako estropadetan zein erloju-contrako binakako estropadetan. Antolakuntzaren edo hark izendatzen duen pertsonaren ardura izango da zozketa nola egingo den erabakitzea.
5. Gipuzkoako Batel Ligako azken estropada Gipuzkoako Batel Txapelketako sailkapen-estropada ere baldin bada, txanden banaketa eta kaleen zozketa probintziako txapelketako araudian ezarritakoa jarraikiz egingo da.
6. Lineako estropadetako kategoria bakoitzean izena eman duten taldeak aintzat hartuta, antolatzaileek honakoak bermatzen saiatuko dira, kategoria bakoitzeko txandak ahalik eta modu arrazoizkoenean banatzearren:
 - a) Kategoria bakoitzeko txandetan gutxienez hiru (3) taldek parte hartzea.
 - b) Txanda bakoitzean klub desberdinetako taldeek parte hartzea, betiere artikulu honetako 2. atalean ezarritakoa errespetatuz.

10.- ARTIKULUA.- ESTROPADA BAKOITZAREN AURREKO BILERA

1. Jardunaldia hasi baino ordu eta erdi lehenago (hau da, lehen kategoriako lehen txanda hasi baino ordu eta erdi lehenago) ordezkarien bilera egingo da antolakuntzak ezarritako lekuan.
2. Estropada hasi aurretik egingo diren ordezkarien bileretan, Estropadako Epaimahaiaren presidentek behar beste agindu eta jarraibide emango dizkie klubetako ordezkariari. Agindu

eta jarraibide horiek berehala eta nahitaez bete beharko dituzte partaide diren talde (batel) eta pertsona guztiek (ordezkari, teknikari, kirolari eta abarrek).

3. Estropada jokatzen den egunean, bat-batean, estropada-eremua egoera txarrean jarriko balitz eta estropada aurrez pentsaturiko moduan egitea komeniko ez balitz, Estropadako Epaimahaiak estropada beste modalitate batean jokatzea agin dezake (erloju-kontrakoa, txanda txikiagoak, estropada-eremua aldatu...), partaideei segurtasun handiagoa emate aldera edo/eta lehiaketa jokatzeke baldintzak berdinago izate aldera.
4. Artikulu honen aurreko epigrafean jasotakoaren arabera, Estropadako Epaimahaiak hasieran aurreikusitako modalitatea aldatzen bada ere, izena eman duten batelak ez dira parte hartzetik salbuetsita geratuko.
5. Gipuzkoako Batel Ligako estropadaren batean hasieran aurreikusita zegoen modalitateren bat aldatzen bada, Estropadako Epaimahaiak jakinarazi egin beharko du ordezkarien bileran.

11. ARTIKULUA.- ORDEZKARIAK

1. Klub bakoitzaren ordezkariaren ardura da Estropadako Epaimahaiak emandako agindu eta jarraibideak bere taldeko kideei jakinaraztea, estropada bakoitzaren aurretik edo jardunaldian zehar.
2. Klubaren ordezkaria izango da klubaren eta bertako kide guztien ordezkari bakarra Estropadako Epaimahaiaren aurrean estropada jokatzen den egunean. Taldearen izenean eta haren ordezkari egin behar diren tramite guztiak egin beharko ditu izena emateko orrian ordezkari izendatzen denak.
3. Kluben ordezkariak soilik egon ahalko dira haien prestaturako den lekuan, Estropadako Epaimahaiaren ondoan.

12. ARTIKULUA.- IZENA EMATEKO ORRIAK EMATEA ESTROPADA BAKOITZERAKO

1. Talde edo batel bakoitzak izena emateko, antolakuntzak horretarako prestaturiko eredu ofiziala erabiliko da.
2. Izena emateko orrian honako hauek agertu beharko dira: taldearen ordezkaria, entrenatzailea eta taldea (batela) osatzen duten kirolariak —lemazaina eta arraunlariak— (titularrak eta ordezkariak). Izena emateko orrian agertzen diren pertsona guztiek indarrean eduki beharko dute federazio-lizentzia.
3. Taldearen ordezkariak ordezkarien bileran eman beharko dio Estropadako Epaimahaiari izena emateko orria.
4. Izena emateko orriarekin batera federazio-lizentziak eman beharko zaizkio Estropadako Epaimahaiari, artxibatuta eta ordenatuta, izena emateko orrian agertzen diren hurrenkera berean.
5. Behin izena emateko orria Estropadako Epaimahaiari eman ondoren, arraunlariak aldatu ahal izango dira, baina betiere kirolaria ordezkoen artean agertzen bada batel horren izena emateko orrian. Gehienez hiru (3) aldaketa egin ahal izango dira —bi (2) arraunlari eta patroia—. Aldaketen berri lehenbailehen eman behar zaio Estropadako Epaimahaiari, betiere parte hartuko den txanda hasi baino lehen.

13. ARTIKULUA.- GIPUZKOAKO BATEL LIGAREN SAILKAPENA

1. Gipuzkoako Batel Ligaren sailkapena egiteko puntuazio-sistema bat erabiliko da; horretarako, lehiaketa osatzen duten estropada guztietan taldeek eskuratutako sailkapenak (postuak) hartuko dira kontuan.
2. Estropada eta kategoria bakoitzeko puntuazio bat emango zaio talde bakoitzari. Kategoria bakoitzean irabazten duen taldeari ligan izena eman duten taldeen kopurua bezainbeste puntu emango zaizkio. Haren atzetik sailkatutako taldeei puntuak modu erregresiboan emango zaizkie; hau da, estropadako sailkapenean aurretik geratu denak eskuratutako puntuazioa ken bat, eta horrela azken sailkatura arte. Azken horrek puntu bat (1) eskuratuko du (kanporaketak edo deskalifikazioak egon ezean).
3. Klub batek kategoria berean hainbat talderen izena eman bada eta sailkatu badira (A, B... batelak), eta hurrengo estropadetan talde gutxiagoren izena eman eta sailkatu badira, azken estropada horretan A, B eta abar taldeek puntuazioa modu korrelatiboan eskuratuko dute.

Demagun kategoria bateko 1. estropadan klub bereko 3 talde sailkatzen direla (A, B eta C), eta kategoria bereko 2. estropadan klub bereko 2 talde sailkatzen direla. Gipuzkoako Batel Ligako sailkapena egitean, puntuazioa honela emango litzateke: azken estropada horretan puntuak A eta B taldeei emango zaizkie, estropada bakoitzean talde horiek osatzen zituzten kirolariak edozein izanda ere.

4. Aurreko atalean ezarritakoa ez da aplikagarria izango klub batek talde baten izena eman eta talde hori kanporatua edo deskalifikatua izan bada, edota estropada utzi badu. Kasu horretan, Gipuzkoako Batel Ligaren sailkapena egiteko puntuazioa kaleratua edo deskalifikatua izan ez den taldeari emango zaio.
5. Gipuzkoako Batel Ligako estropada bakoitzaren ostean eta Ligaren amaieran egingo da sailkapena, eta puntu gehien eskuratu dituen taldea izango da Ligako 1. sailkatua edo txapelduna. Berdinketarik egonez gero, irizpide hauek erabiliko dira hurrenez hurren:

- a) Lehen irizpidea: garaipen edo lehen postu gehien estropadetan.

Berdinduta dauden taldeen kopurua edozein dela ere, berdinduta dauden taldeen artean Gipuzkoako Batel Ligako estropadetan garaipen (lehen postu) kopururik handiena duena sailkatuko da aurretik.

- b) Bigarren irizpidea: garaipen gehien lortu duena elkarren aurka jokaturiko estropadetan.

Bi talde edo gehiago badaude berdinduta eta haietako inork estropadarik irabazi ez badu edo garaipen (lehen postu) kopuru bera lortu badute, elkarren arteko neurketak hartuko dira aintzat; hala, Gipuzkoako Batel Ligako estropadetan sailkapen hobe maizago eskuratu duen taldea izango da irabazlea.

- c) Hirugarren irizpidea: azken estropadan hobeto sailkatzen dena.

Aurreko irizpideak aplikatu eta oraindik ere berdinduta badaude, Gipuzkoako Batel Ligako azken estropadako emaitza hartuko da kontuan, eta bertan aurretik sailkatu den taldearen alde erabakiko da berdinketa.

- d) Laugarren irizpidea, berdindutakoen artean zozketa.

Irizpide hori erabili behar bada berdinketa hausteko, zozketa egingo da, baldin eta berdinduta dauden batelak exequo (denbora berean) helmugaratzen badira azken estropadan.

6. Bi batel edo gehiago exequo helmugaratzen badira, puntu-kopuru bera emango zaie Gipuzkoako Batel Ligarako. Berdinduta dauden taldeei posturik onenari dagokion puntu-kopurua emango zaie, eta denbora berean bukatu ez duten gainerako taldeen puntuazioak bere horretan utziko dira.
7. Talde bat estropada batetik kanporatu edo deskalifikatuz gero, dela Estropadako Epaimahaiaren erabakiz, dela GAFen Lehiaketako Epaille Bakarraren erabakiz, ez zaio batere punturik emango.
8. Talde batek estropada utzi edo bukatu ezean, honako hau egingo da:

- a) Justifikaturiko arrazoiengatik edo besteri egotz lekizkiokeen arrazoiengatik estropada bat amaitzen ez bada:

Denboraldian zehar jokatu diren estropadetan talde kaltetuak batez beste lortu duen puntu-kopurua emango zaio. Gertakaria talde horrek parte hartzen duen lehen estropadan gertatzen bada, kategoria horretan parte hartzen duten taldeen puntuazioaren batezbestekoa emango zaio. Parte hartzen duten talde-kopurua bakoitia bada, gorantz zuzenduko da (puntu bat gehiago emango zaio).

Lehiaketako Epaille bakarrak erabakiko du idazpuru honetan jasotako egoera den, eta berak baloratuko du. Oro har, justifikaturiko arrazoiengatik edo besteri egotz lekizkiokeen arrazoiengatik estropada bat amaitu gabe utzi dela ulertuko da batel bati bere txanda amaitzea oztopatzen bazaio, kasu hauetakoren bat dela medio:

- Antolakuntzari egotz dakizkiokeen gertakariak estropada-eremuan.
- Hirugarrenek gauzaturiko ekintzak, partaideak izan zein ez, eta kirol-arau orokorren aurkakoak direnak.

Ez dira idazpuru honetan sartuko estropadak amaitu gabe uzteak, baldin eta hurrengo atalean jasotzen diren egoerengatik gertatzen badira:

- b) Justifikaturiko arrazoi batengatik estropada uztea, baina besteri egozgarria ez dena:

Ez zaio batere punturik emango.

Lehiaketako Epaile bakarrak erabakiko du idazpuru honetan jasotako egoera den, eta berak baloratuko du. Oro har, justifikaturiko arrazoi batengatik estropada utzi dela baina besteri egozgarria ez dela ulertuko da honako egoera hau: talde batek estropada ez amaitzea materialarekin zerikusia duen arrazoiengatik (ontzia, arraunak eta abar), tripulazioagatik (arraunlariak, patroia eta abar) edo naturagatik (klimatologia, itsasoaren egoera eta abar).

9. Ligaren amaieran, azken sailkapena egiterakoan, talde bakoitzak estropada guztietan lortutako puntuazioa batuko du, batena salbu: puntuazio okerrean eskuratu duten estropada. Adibidez, liga batean 12 estropada jokatzeko badira, talde bakoitzak 11 estropadetako puntuak batuko ditu (puntuazio onenak eskuratu dituen estropadetakoak, alegia).

14.- ARTIKULUA.- ESTROPADEN KONTROL TEKNIKOA: ESTROPADAKO EPAIMAHAI

1. Estropadako Epaimahaiaren eginkizuna izango da estropada bakoitza zuzentzea, ikuskatzea eta teknikoki kontrolatzea; epaimahai horretan Gipuzkoako Arraunketa Federazioaren Epaile Eskolako kideak egongo dira.
2. Taldeek, ordezkariaren bidez, erreklamazioak aurkeztu ahal izango dituzte Estropadako Epaimahaiaren aurrean, Euskadiko Arraunketa Federazioaren Estropada Kodearen arabera.
3. Estropadako Epaimahai osatzen duten epaile-arbitroen erabakiak egokitzat jotzen dira, eta Estropadako Epaimahaiak jaso eta izenpeturiko aktak beharrezko dokumentuak dira lehiaketa behar bezala gauzatzeko. Dena dela, konpon litezkeen hutsegite arbitralek —arau teknikoaren interpretazio eta aplikazio hutsera mugatzen ez direnak— estropaden emaitzak aldatzea ekar lezakete, eta, beraz, baita Gipuzkoako Batel Ligako sailkapena aldatzea ere.

15. ARTIKULUA.- ESTROPADA-KODEA

1. Gipuzkoako Batel Ligako estropadak gainbegiratzeari eta teknikoki kontrolatzeari dagokionez, Euskadiko Arraunketa Federazioaren Estropada Kodeak ezartzen duena erabiliko da.
2. Euskadiko Arraunketa Federazioaren Estropada Kodea erabiliko da Gipuzkoako Batel Ligan, betiere araudi honetan bestelakorik edo aurkakorik esaten ez den gaitetan.

16. ARTIKULUA.- ESTROPADEKAKO EPAIMAHAIAREN ERABAKIEN AURKAKO ERREKURTSOAK

Estropadako Epaimahaiaren erabakien aurka errekurtsoa aurkeztu ahal izango da Gipuzkoako Arraunketa Federazioaren Lehiaketako Epaile bakarraren aurrean. Horretarako bi laneguneko epea egongo da, aurkaratu nahi den erabakia hartu zen estropada jokatu eta biharamunetik zenbatzen hasita. Inpugnazioak epe horretan aurkeztu beharko dira, idatziz, Gipuzkoako Arraunketa Federazioaren egoitzan; gertakariak eta zergatiak azaldu beharko dira, frogak ere bai, eta bereziki aipatu beharko da zer eskatzen den.

Erreklamazioarekin batera 30 euroko fidantza eman beharko da; inpugnazioak aurrera eginez gero, erreklamazioa egin duen pertsonari kopuru hori itzuliko zaio.

17. ARTIKULUA.- LEHIAKETAKO EPAILE BAKARRA

1. Gipuzkoako Arraunketa Federazioaren Lehiaketako Epaile bakarrak eskumena du jakiteko Gipuzkoako Batel Txapelketan gertatzen diren eta diziplinakoak ez diren lehiaketako gai oro, betiere haiek ebaztea beste organo baten esku utzi ez bada.
2. Gipuzkoako Arraunketa Federazioaren Lehiaketako Epaile bakarrari araudi honek ematen dizkion ahalmenei eta eskumenei kalterik eragin gabe, entitate horren diziplina-organoren ardura izango da Gipuzkoako Batel Txapelketan gertatzen diren kirol-diziplinarekin loturiko arau-urratzeak epaitzea eta egileei euren erantzukizuna betearaztea.
3. Gipuzkoako Arraunketa Federazioaren Lehiaketako Epaile bakarraren egitekoa da araudi honen edukiaren gainean sor litezkeen auziak ezagutzea eta ebaztea, bai interpretatzeari dagokionez bai araudi honetan jasotzen ez den auziren bat sortzen bada. Kasu horietan, gertaerak edo

zirkunstantziak ikusirik, kirol-lehiaketetan erabili ohi diren printzipioak eta irizpide orokorrak aintzat harturik ebatziko da auzia.

4. Gipuzkoako Arraunketa Federazioko Zuzendaritza Batzordeak izendatuko du Lehiaketako Epaile bakarra, eta Batzar Nagusiak onetsiko du.
5. Gipuzkoako Arraunketa Federazioaren Lehiaketako Epaile bakarraren erabakiak edo ebazpenak interesatuei jakinaraziko zaizkie. Nolanahi ere, indarrean dagoen legeriaren arabera pertsonen ohore- eta intimitate-eskubideak errespetatuz, Gipuzkoako Arraunketa Federazioaren Lehiaketako Epaile bakarrak Gipuzkoako Batel Ligaren inguruan hartutako erabakiak edo ebazpenak argitaratu ahal izango dira.
6. Gipuzkoako Arraunketa Federazioaren Lehiaketako Epaile bakarraren ebazpenak berehala sartuko dira indarrean, non eta kautelazko etendurarik ez dagoen. Hau da, arau orokor gisa eta arrazoituriko etendurarik ez badago, Gipuzkoako Arraunketa Federazioaren Lehiaketako Epaile bakarraren ebazpen baten aurka erreklamazio edo errekurtsio bat jartzeagatik ez da geldituko, indargabetuko edo bertan behera geratuko erabakitakoa.
7. Gipuzkoako Arraunketa Federazioaren Lehiaketako Epaile bakarraren ebazpenek amaitutzat ematen dute federazio-bidea, eta haien aurkako errekurtsioa aurkez daiteke Kirol Justiziako Euskal Batzordean.

18. ARTIKULUA.- DOPINAREN AURKAKOA

1. Gipuzkoako Batel Ligan dopina prebenitzeko, kontrolatzeko eta erazteko araudi hauek erabiliko dira:

Gipuzkoako Arraunketa Federazioaren dopinaren aurkako araudian Euskal Arraunketa Federazioak ezarritakoa izango da aplikagarria, eta euskal federazioak izango ditu Gipuzkoako Arraunketa Federazioko txapelketa ofizialeetan dopina prebenitzeko, kontrolatzeko eta zigortzeko funtzioak.

19. ARTIKULUA.- PARTAIDETZA-KANONA

Antolakuntzak, Zuzendaritza Batzordeak hala erabakita, onartu ahal izango du kanon bat kobratzea Gipuzkoako Batel Ligan parte hartzen duten eta antolakuntzan parte hartzen ez duten klubei. Estropaden antolakuntzan laguntzearen ordainetan, kanon-kontzeptuan jasotzen diren kopuruak proportzionalki banatuko dira antolakuntzan laguntzen duten entitateen artean, Gipuzkoako Batel Ligan eta hura osatzen dute estropadetan partaide izan zein ez.

20. ARTIKULUA.- KOMUNIKAZIORAKO APARAILU TEKNIKOAK:

Debekatuta dago eskolarteko kategoriako ontzikideei (infantilak eta kadeteak) zuzenean edo zeharka jarraibideak edo aholkuak ematea edo horiek zuzentzea aparailu elektriko edo elektronikoak edota beste baliabide tekniko edo teknologikoak erabiliz.

XEDAPEN INDARGABETZAILEA. -KLAUSULA INDARGABETZAILE OROKORRA

Gipuzkoako Batel Ligan erabiliko den araudi honek, indarrean sartzen den egunetik aurrera, indarrrik gabe uzten ditu txapelketa horretan orain arte erabili diren xedapen, ohitura eta akordio guztiak.

AMAIERAKO LEHEN XEDAPENA. -HIZKUNTZA

Gipuzkoako Batel Ligan erabiliko den araudi hau euskaraz eta gaztelaniaz aurkezten da. Hizkuntza batean eta bestean adierazitakoaren artean desadostasunik sortuko balitz, gaztelaniazkoa nagusituko da.

AMAIERAKO BIGARREN XEDAPENA. -INDARREAN SARTZEA

Gipuzkoako Batel Ligan erabiliko den araudi hau indarrean sartuko da Gipuzkoako Arraunketa Federazioaren Batzar Nagusiak onartzen duenean, Gipuzkoako Foru Aldundiaren Kiroletako Zuzendaritza Nagusiak onartzen duenean eta Euskadiko Kirol Erakundeen Erregistroan inskribatzen denean.

Gipuzkoako Batel Ligan erabiliko den araudi hau, Gipuzkoako Arraunketa Federazioak egina, 2009ko abenduaren 17an onartu zuen GAFek, Donostian, ezohiko Batzar Nagusian. Araudi honetan aldaketa partzialak gehitu dira, GAFek egindako ezohiko Batzar hauetan adostutakoaren ondorioz:

- Donostian, 2012ko apirilaren 2an
- Donostian, 2012ko abenduaren 19an
- Donostian, 2014ko urtarrilaren 8an
- Donostian, 2015eko abenduaren 15ean
- Donostian, 2016ko azaroaren 30ean

Eta hala jasota gera dadin, eta adostasuna adierazteko, (jatorrizkoa) sinatu du Idazkariak, GAFeko Presidentearen oniritziarekin.



Presidentea

Zigilua

Idazkaria